

王公奏稿卷之二

三原介菴王恕奏議

後學華亭謝應徵校正

南京刑部

彗見地震乞休致奏狀

臣見年五十三歲係陝西西安府耀州三原縣人由進士改庶吉士正統十四年

欽除大理寺左評事歷陞寺副知府左右布政使左右副都御史及今官屢被

三才卷之二
朝廷莫大之恩叨享祿位二十餘年雖夙夜
兢惕欲圖報稱柰學術淺陋終無裨益切
惟災異莫大於彗見地震而召致之由無
踰於刑獄之冤濫茲者彗見於上地震於
下固由臣等諸司官吏不能上體
聖心欽崇天道恪修職務之所致而臣司刑之
官失職之罪比衆尤爲甚也伏蒙

聖慈特賜優容不加譴罰勉臣等省身修職以
回天意臣雖至愚豈不知感但臣年力衰

憊才德罔稱不能効用無補

明時徒縻廩祿若復包羞固位將來隳政廢
事取譏於人獲譴於天恐不止此伏望

聖恩憐憫將臣放歸田里苟全微體另任賢能
大新至治庶幾優劣得所而天意可回矣臣不
勝戰慄之至具題請

旨

聞父喪復請給 誥命奏狀

臣係陝西西安府耀州三原縣人由進士

改庶吉士歷任評事寺副知府左右布政使成化元年欽蒙

聖恩陞都察院右副都御史成化三年爲功次事陞本院左副都御史巡撫河南成化四年四月十六日實歷左右副都御史俸三十六箇月三年考滿給由間本月十七日准吏部咨爲缺官事陞今職

命臣就彼赴任管事臣以此不曾赴京給由就於本月二十九日到任管事訖彼因先任

副都御史應得

誥命未曾請給爲念臣父年已八十有一惟恐不能有待已經具奏乞

恩請給急欲得之以爲臣父生前一日之榮吏部因臣三年考滿未曾赴京給由不蒙請給臣父果不能有待於本年十二月二十六日在家病故臣於成化五年二月十一日聞喪今臣雖欲爲父求生前一日之榮有不可得矣仰惟

聖朝以孝治天下凡兩京官曾經三年考滿者
照依品職給與

誥勅封贈祖父母父母俾各遂其孝親之心是
以賢者能者莫不感激思報誠隆古所無
之

恩典也中間有為親乞

恩者雖未滿三年亦蒙

聖慈憐憫給與

誥勅光被存沒臣先任副都御史三年已滿誤

蒙

聖恩陞擢今職又將一年況任內別無違碍止
因未曾赴京給由之故而應得

恩典不及其親人子之情寧能自己伏思臣任

江西右布政之時流賊高安吳廣華等千
有餘徒在於廣東程鄉縣地方屯聚屢犯
贛州府縣燒劫縣治剽掠鄉村殺害官吏
軍民臣同都指揮王貴督令軍快前去剿
捕任右副都御史之時強徒梁溫汪四等

千百餘人在於南陽府雙廟兒爭占銀鑛
擅立營寨私造軍器互相讐殺幾生他變
具 臣到彼調度軍快設法撫捕俱獲其渠魁

奏處置訖況在荆襄殺賊臣亦曾効勞夫為
臣伐功固非美德為親乞

恩實乃至情伏望

皇上天地之心念臣節次微勞憫臣愚悃恕臣
死罪乞

勅該部給臣先任左副都御史應得

誥命臣父雖沒得以所

贈官銜題寫銘旌榮于殯葬之時光于泉壤
之下臣生當隕首死當結草臣急於為親
自陳無狀干冒

天威不勝戰慄之至謹具奏

聞

蒙賜 誥命謝 恩奏狀

近者欽蒙

聖恩賜臣先任都察院左副都御史

誥命進臣階通議大夫贈臣祖父惟貞父仲智

俱通議大夫都察院左副都御史祖母張

氏母周氏妻蓋氏繼室張氏俱淑人伏念

臣資質凡庸學問膚淺過蒙錄用常切慚

惶志雖不忘乎公才實無補於治況此憂

服之日值茲

曠蕩之恩

龍章降自

九重豸服被於三世光榮罕儷寵幸何加臣

敢不殫犬馬之勞答

乾坤之造除望

闕謝

恩外謹具奏

聞

蒙賜 葬祭謝 恩奏狀

臣父仲智先蒙

勅封文林郎大理寺左寺左評事成化四年十

二月二十六日在家病故復蒙

聖恩給賜誥命贈通議大夫都察院左副都御史遣進士蔡晟造墳安葬陝西布政司右叅政賈傑

諭祭今已事畢伏念臣素乏才猷誤蒙任使雖竭駑駘之力曷酬

覆載之仁夙夜兢慚莫知攸措值慈父違榮於三畚致

湛恩降賜於

九重既葬既祭逮下之禮無以加載馳載馳報

上之誠罔敢後除望

闕謝

恩外謹具奏

聞

總理河道

論報管河工程及乞禁馬快船附搭私貨奏狀

節該欽奉

勅諭令臣管理一帶河道臣自通州直抵儀真等處往來嚴督郎中等官陸鏞等將一應河道事宜但係日前廢弛損壞者令其逐一漸次修復及將淮安揚州二府等處淺澁難行河道俱已挑濬深闊但緣淮揚一帶運河別無泉源止藉高郵邵伯等湖所積雨水柰何彼處地方自去歲秋冬以來至今一向少雨湖水消耗慮恐開通閘河

走泄水利愈致淺涸已令淮安府暫於清江閘越河并新莊閘下添設二壩車盤船隻及令揚州府委官前去瓜洲儀真等處車岸江水接濟臣在揚州府躬率官吏人等設壇祈禱雨澤待有水之時撤去新莊壩方開閘河照得去年因是揚州等處久旱不雨遂致糧運遲滯今又似前乾旱臣以爲當斯之時北有守凍回還等項船隻南有白糧并各衛所兌運船隻一往一來

相挨而行又有南京裝運官物馬快船隻日逐相繼而來每起或五七十隻或三四十隻且又船大載重難為撐駕其餘運糧等項船隻一見前來舉皆退避讓路動經數日不敢前進及到閘河積水雖不滿板亦須通閘開放閘內運船不無淺閣兼且往年江北衛所運船俱在瓜洲淮安等處交兌比及三月已完八九完者就行尚以爲遲今年俱往蘇松等處兌運今有三月

將半兌完而回者僅見一二若不預爲處置誠恐糧運遲滯非惟負累軍士抑且有誤

國計如蒙乞

勅該部計議合無速行南京守備內外官員將年例該進鮮物依期撥與快便船隻裝送仍禁約夫甲人等不許裝載江米板片磁器等項重物在內其餘裝運竹木馬槽等項物件者暫候有水時月逐起發運庶幾

京儲不致遲悞軍民得其便益成化八年
三月十二日具題

言開河事宜并乞先修舊塘水閘奏狀
臣看得揚州一帶河道南臨大江抵長
淮別無泉源止藉高郵邵伯等湖所積雨
水接濟湖面雖與河面相等而河身比之
湖身頗高每遇乾旱湖水消耗則河水輒
爲之淺澁不能行舟若將河身濬深三尺
則湖水自來河水自深雖遇乾旱亦不阻

船前項河道自南至北四百五十餘里中
間除深闊不用挑濬外其淺窄可挑濬去
處尚有二百餘里約用九萬餘人六十二
可完每人日給口糧二升該用糧米一十
萬八千餘石捲埽打壩共用椿木一萬六
千餘根草二十餘萬束及看得高郵湖自
杭家嘴至張家溝南北三十餘里俱係磚
砌隄岸每遇西風大作波濤洶湧損壞船
隻失落錢糧人命不可勝計况前項隄岸

之外地勢頗低若再濬深三尺闢一十二丈起土以爲外隄就將內隄原有減水閘三座改作通水橋洞接引湖水於內行舟仍於外隄造減水閘三座以節水利雖遇風濤亦無前患若興此役約用一萬三千餘人六十工可完每人日給口糧二升該用糧米一萬五千六百餘石合用築隄椿木五萬四千餘根草二十七萬餘束造減水閘并改造通水橋洞約用椿木磚石等

料并工價銀二百餘兩又看得揚州灣頭鎮迤東河道內通通泰等五州縣二千戶所富安等二十四鹽場其間有魚鹽柴草之利在前河道疏通之時二千戶所運糧船隻俱在本所船修客商引鹽裝至儀真每引船錢不過用銀四五分揚州柴草每束止賣銅錢二三文近年以來河道淤淺不曾挑撈加以天旱雨少河水乾斷舟楫不通魚鹽柴米等項俱用旱車裝載二所

運糧船隻不得回還本所牛車脚貴柴米價高以致客商失陷本錢軍民不得聊生前項河道自灣頭起至通州白浦止三百四十餘里俱用挑闊八丈深三尺約用八萬五千六百餘人六十工可完每人日給口糧二升該用糧米十萬二千七百九十餘石再看得雷公上下塘句城塘陳公塘俱係漢唐以來古蹟各有放水減水閘閘年久坍塌遺址見在邇年以來

土壩攔水隨修隨坍不能蓄積水利若勾塘修造板閘一座減水閘二座潦則減水不致衝決塘岍旱則放水得以接濟蓮河以上四塘共造放水板閘四座減水閘八座除舊有磚石外約用磚石椿木等料價直并匠作工價銀二千餘兩臣雖無識詢之于衆咸以謂若將以上三件河道依前整理庶幾舟楫疏通永無淺阻風濤之患而為往來軍民無窮之便也但係前項工

程浩大合用人力錢糧數多況揚州府地方連年災傷人民窮困已極倉庫錢糧不敷兼且邇來

玄象示警黠虜入寇人心驚疑如斯之役未易輕舉須候時和歲豐人力寬舒方可爲之惟修理陳公等塘閘座一事既不起倩人夫止用前項工價爲之頗易如蒙乞

勅該部計議合無於本府收貯解京船料銅錢內委官支給收買物料修造閘座亦可以

蓄積水利接濟運河爲此成化八年三月二十二日具題

乞罷巡河管泉等項官員奏狀

准本部咨准吏部咨該

欽差印綬監太監韋煥題裏河一帶自通州直抵儀真等處雖有巡河御史等官因無專主等待更替致使河道連年淤淺阻礙船行具題抄出該吏部會同戶工二部計議奏奉

欽依自通州至德州一帶河道着郎中陸鏞專
管自德州至濟寧一帶着副使陳善專管
自沛縣至儀真瓜洲一帶着郎中郭昇專
管仍請

勅命臣總理其事嚴督沿河一帶巡視等官并
軍衛有司人等凡前項河洪閘壩湖泊泉
源舖夫井樹及一應河道事宜根究本末
設法措置以次修復不許諸人侵占阻滯
務在通行經久利便其見在管河巡河管

泉等項官員應否去留宜從總理河道官
處置定奪行移到臣除領

勅前去沿河一帶提督郎中等官陸鏞等并軍
衛有司人等將河洪閘壩湖泊泉源舖夫
井樹及一應河道事宜根究本末設法措
置漸次修復候工程完日另行具

奏外查得揚州府一帶河道見有主事崔陟
管理淮安府一帶河道見有漕運衙門問
刑主事游佐并清江浦提舉司督造船隻

主事屠勳兼管徐州洪有主事王道專管
呂梁洪有主事謝敬專管濟寧南北天井
等二十閘主事過璘專管臨清至荆門一
十五閘衛河提舉司督造船隻主事南鵬
兼管濟寧迤南至儀真瓜洲又有御史方
中專管巡河迤北至直沽等處又有巡鹽
御史兼管巡河兗州等處又有主事張盛
專管泉涿臣看得徐呂二洪濟寧州天井
在城趙村三閘臨清縣新開等四閘最為

緊要不可一日無人管理其餘河道關壩
泉源今既令郎中陸鏞副使陳善郎中郭
昇等專管若又存留管河巡河管泉主事
御史管理非惟甲可乙否掣肘難行抑恐
互相推托因而悞事合無令主事王道專
管徐州洪謝敬專管呂梁洪過璘專管濟
寧州天井在城趙村三閘并上新下新官
村莫泰四閘南鵬兼管臨清縣新開等四
閘其餘一應河道關壩泉源等項着陸鏞

郭昇陳善各照原分地方管理將管河主
事崔陞管泉主事張盛巡河御史方中取
回其餘問刑造船主事巡鹽御史兼理河
道者令其止管本等事務不必似前兼理
庶幾事體歸一易於責成緣係該部奏奉
欽依見在管河巡河管泉官員應否去留宜從
總理河道官處置定奪事理未敢擅便謹
題

言詔令不可失信奏狀

臣聞信者國之寶民之所依以立者也
詔者國之號令敷

恩澤感人心而示之以必信者也易曰渙汗其
大號言號令如汗之出而不反也書曰慎
乃出令令出惟行弗惟反言號令之出不
可不謹行之不可不信也魏文侯小國之
君不失虞人之期商鞅伯者之佐不廢徙
木之信矧爲億兆之

君師者乎庸言亦信庸行亦謹矧布

詔令於四方者乎臣伏觀

詔書內一款自成化七年十一月十六日昧爽以前官吏軍民人等有犯除謀反大逆謀叛子孫謀殺祖父母父母妻妾殺夫奴婢殺主蠱毒魘魅毒藥殺人強盜人命妖言不赦外其餘已發覺未發覺已結正未結正罪無大小咸赦除之敢有以赦前事相告言者以其罪罪之欽此臣聞順德府知府黎永明止因毆公差人員獲譴浙江布政使等官劉福

等止因織造段疋不如法致罪別無另項重情況又犯在革前今却以降調等項發遣是前項

明詔不信於天下也設或此事傳播四方使懼罪逃避反側不安者聞之誰肯自首求免乎臣恐由是幅員之內人懷危疑倘有不虞之事發咫尺之書求濟一時之急誰復肯信不信則不從不從豈不誤

朝廷之大事乎議者以爲生殺予奪由

朝廷臣下豈宜妄議臣愚以爲理之當生殺予奪而生殺予奪之可也不當生殺予奪而生殺予奪之未可也若賞一人而千萬人勸則賞之罰一人而千萬人懼則罰之此公天下之賞罰則所謂理之當生殺予奪而生殺予奪者也賞一人而千萬人不勸則謂之淫賞罰一人而千萬人不懼則謂之濫罰此非公天下之賞罰即所謂理之不當生殺予奪而生殺予奪者也且

君以聽言爲明臣以進言爲忠

朝廷賞罰合乎宜臣固當將順之未合乎宜亦當匡救之豈可以越人視奈人之肥瘠忽焉而不加喜戚於其心乎然絮木明等之事雖曰出自一時

聖斷而執法之官亦不能辭其責何則漢文帝時張釋之爲廷尉文帝欲重犯蹕之罪釋之曰當罰金文帝怒釋之曰法者天下之公共也今法如是更重之是法不信於民

也且廷尉天下之平也一傾天下用法皆
爲之輕重民安所措其手足文帝從之其
後文帝又欲族盜高廟器者釋之曰當棄
市文帝怒釋之謝曰法如是足也今盜高
廟器而族之假令愚民取長陵一坏土陛
下且何以加其法乎文帝許之至今百世
之下莫不稱文帝之仁明釋之之執法設
若初發落黎永明等之時法司能如釋之
之執法以奏

陛下聖明寬仁未有不賜

俞允黎永明等未有不蒙

曠蕩之恩天下後世未有不稱

陛下如文帝稱今之法司如釋之者然而此事

雖小害信爲大臣之所以懇懇爲

陛下言者不但爲黎永明等惜爲天下惜不但

爲天下惜實爲

朝廷惜也倘蒙

陛下不棄芻蕘之言將黎永明等並依革前宥

之使復其職庶

明詔可以取信於天下而不誤事於將來矣臣
愚更望

陛下自今伊始凡理之當罰者雖貴近必罰功
之當賞者雖疏遠必賞發一號令出一
詔旨亦宜熟思審處求合人心然後付之有司
行之天下如金石之堅如四時之信使萬
姓咸悅遠近歸心又何患中國之不安四
夷之不服哉若賞罰過當號令不一曰治

曰安非臣之所能知也臣以菲材叨司邦
刑知而不言是謂有隱伏乞

皇上憐其直赦其罪不勝大幸

言運船前進回淮揚修理河塘壩座奏
狀

臣先准戶部咨提督分管河道郎中等官
并沿河一帶軍衛有司整理河道催餉糧
船七月十八日等日淮揚地方風雨大作
山水泛漲衝決河塘壩座損壞隄岸隨即

提督各該委官整理修築緣工程浩大卒
急難完已將糧船俱過揚州月日及修理
河塘壩座略節緣由各另具

題外近准吏部左侍郎尹旻咨爲督催漕運
事臣又公同本官并總督漕運左僉都御
史張鵬等往來提督催僨糧船昨在德州
已將河道近頗有水并糧船所過地方
由具

題外今臣已抵直隸河間府靜海縣地方
得各衛所糧船已到京通等倉上納及過
天津迤北者約有十之七過臨清者約有
十之九俱已晝夜前進無阻况有侍郎尹
旻等催僨處置事必停妥臣欲候糧船俱
到通州之日前去督修淮揚河塘壩座誠
恐冬深土凍前工難成有悞來年漕運之
計未便除於十月初一日前去淮揚督修
河塘壩座外謹具題 知
言管河官應否添設奏狀

准工部咨都水清吏司案呈准戶部四川清吏司手本奉本部送戶科抄出巡按直隸監察御史婁謙題五事內一件整理河道事看得管河官員原無額設俱係沿河軍衛有司委官管理各多懦弱無為更易不常以致責無所歸事鮮成效見今雖有工部郎中陸鏞等官分投管理然亦不過提其大綱而已若欲事有定規必須官有專主查得臨清濟寧沿河一帶府州縣分俱有額設管河官員如蒙乞

勅該部計議合無自通州直抵臨清除各府州并全設縣分照舊委官管理外其餘裁減縣分照依臨清迤南事例添設管河官員不許別項差使各另專一管理河道等因該通政使司官奏奉

聖旨該部知道欽此欽遵備由手本到司案查近該

欽差總理河道刑部左侍郎王 題稱自儀真

直抵通州一帶河道閘座泉源照依原擬分與郎中等官陸鏞等管理要將管河主事崔陞管泉主事張盛巡河御史方中取回其餘造船主事巡鹽御史兼理河道者令其止管本等事務庶使事體歸一易於責成等因本部已經依擬覆

奏通行遵守去後今巡鹽御史婁謙又奏前因案呈參照所奏要於裁減縣分照依臨清迤南事例添設管河官員一節未審有

無相應違礙合就移咨斟酌應否移會時宜徑自施行備咨准此照得通州直抵臨清一帶河道委的多有灘淺旱則阻滯船隻潦則衝決隄岸常要扒撈修築必如御史婁謙所言將前項地方裁減縣分照依臨清迤南事例添設管河官員專一管理方能有濟但沿河順天府所屬七州縣河間府所屬十州縣廣平府所屬中間止有武清一縣原設淺鋪修隄等項人夫二百

三十名却係全設衙門其餘裁減縣分人夫多者不過百餘名少者止有三五十名比之臨清迤南縣分河道工程人夫數目不及十之一二若各添設官一員專管俸祿僕馬不無煩擾及查得沿河揚州府所屬四州縣淮安府所屬六州縣徐州府所屬沛縣中間閘壩洪淺湖塘等項最為緊要每處所設各項人夫多者數千名少亦不下數百名每歲修隄打壩等項費用皆

草等料數百萬計前項府州縣亦無添設管河官員止是委官管理若府州縣所委官員專一往來督屬整理亦不誤事若何常被巡撫巡按等官差委勘理別事動經旬月不到河塘況所屬委官多不得人雖有分管河道郎中等官地方廣遠一時照管不及未免有誤如蒙乞

勅該部計議合無照例將順天河間揚州淮安四府各添設管河通判一員徐州添設管

河判官一員專一督同所屬官吏委官整
理河道一應事務俱不許別項差遣仍令
分管河道郎中副使等官往來提督比較
如此則官亦不繁事亦可集緣係工部行
令臣斟酌應否務合時宜徑自施行事理
未敢擅便具題

言裏河一帶災異奏狀

去年自京師直抵揚州南北三千餘里水
旱災傷五穀薄收軍民艱食今歲正月初

間止得一雪自雪後至今八十餘日雨澤
少降狂風迭作飛沙揚塵遮天蔽日彌月
不止田地乾燥河水耗散麥苗出土多被
沙壅穀種雖下未曾萌芽臣又訪得臨清
武城至德州一帶地方二月初四日申時
分有黑氣自西北而來忽然晝晦出手不
見掌比之夜間天陰無星月之時黑暗尤
甚移時方退民心十分驚愕不寧臣雖不
通術數亦知其非休徵也但沿河一帶軍

民目今已自十室九空缺食糊口父母兄弟離散妻子不相顧流移死亡不可勝數若到四月間再不降雨二麥恐無所望富者亦難存活臣往來河道之間目擊耳聞豈忍循默伏望

皇上以

宗社爲念特降香帛遣官分祭各處山川之神祈禱雨澤以濟枯涸以慰民望以固根本仍

詔廷臣講究弭災卹患之策求其至切至要可以回天意可以安民心可以延

國祚於億萬年者而力行之必有效驗臣不勝大願爲此具題

該禮部覆

奏奉

聖旨山東百姓旣十分艱難須行實惠便降詔將今年稅糧等項盡行蠲免順天等府有災傷處也量宜減免祭告遣侍郎劉吉就着關

領香帛銀兩去

言山東得雨河道疏通奏狀

今年三月十二日臣自通州南下本月二十五日到東昌府武城縣臣將沿河地方自正月以來雨澤少降狂風迭作田地乾燥河水耗散乞

請香帛祈禱等項緣由具

題外四月初四日臣至濟寧訪得本州於三月二十八日夜得雨一陣不久而止至魚

臺詢訪得雨日期與濟寧同而其勢頗大其雨止可潤地河水無增四月十五日晚至古城驛遇雨至次日早方止河水頗增自古城而下至淮安至揚州河水深闊船隻無阻臣復自揚州北上整理河道催催糧船五月初五日到宿遷縣地方偶遇河水泛漲比舊約增五六尺之深詢問北來公差官員皆說近日山東徐州等處得雨閘河一帶俱有飽水臣又訪得未得水時

泗州淮安等衛糧船到宿遷等縣陸家墩等淺俱曾起剥得水之後臣親見懷遠河陽新安鳳陽儀真留守左等衛糧船至彼皆不起剥又得順風俱各張帆而行滔滔無阻略不費力軍民懽悅皆曰今年得水早糧船比舊年定然早到此皆

朝廷洪福軍民賴之臣職專河防久早之餘遇茲大水豈勝忻忭除僨糧船日夜前外緣係河道得水糧運疏通事理具題

改南京戶部左侍郎謝恩奏狀

臣先任刑部左侍郎

欽差總理河道近准本部咨准吏部咨

欽改前職伏念臣材質凡庸學術疎淺偶中奉

闈之選麤拙

祕閣之書任評事任寺副恒憂讞議之未明

爲知府爲布政每懼承宣之無狀兩副都

憲而左以右陞再佐秋官而北由南轉食

祿年久感

恩日深雖迫桑榆之年難忘

聖主豈知錢穀之託遽及愚臣撫已若驚覩顏
就列臣敢不堅持晚節益勵初心竭犬馬
之微勞答

乾坤之大德臣無任感

天荷

聖激切屏營之至除望

闕謝

恩前去到任管事外謹題

南京戶部

處置運糧餘丁月糧奏狀

廣東清吏司案呈抄蒙

欽差南京守備太監安寧等節該欽奉

勅爾等會同將南京各該衛所旗軍并新江口
等處寄操旗軍查勘酌量選補運糧若正軍
數少即將殷實餘丁點湊照依正軍事例免
其一丁差使幫貼月支米一石養贍家口行
糧賞賜一體關給欽此欽遵除該年依

勅選補外自是以後各衛所餘丁因見運糧者
月支米一石又有行糧賞賜別差者無有
糧賞所以皆願運糧而不願別差衛所官
吏受其親屬凡遇運糧旗軍逃故多不於
正軍內選差輒將餘丁撥補甚有將在運
旗軍捏故掣回改差就以餘丁更替及至
逃故等項旗軍復役補役又不送去上運
替回餘丁改差所以食糧餘丁一年多似
一年在倉糧儲一歲少如一歲又如在外

衛所旗軍有月支本色米八斗者有月支
本色米六斗者而運糧餘丁一例俱支米
一石比運糧正軍支米反多若不處置非
惟錢糧妄費抑且

恩澤不均案呈如蒙乞

勅該部計議合無通行內外軍衛衙門今後不
許將運糧旗軍捏故掣回改差果有逃故
等項仍照先奉

勅書內事理先儘操備等項旗軍查勘酌量選

補若正軍數少方許將餘丁點湊如運糧
逃故正軍復役補役即令上運替回餘丁
改差在外衛所運糧餘丁若該衛所正軍
食糧一石者亦與糧一石食糧八斗者亦
與糧八斗食糧六斗者亦與糧六斗不可
使餘丁食糧多於正軍其選補運糧旗軍
餘丁俱於運糧完足回營之日選補仍將
選過餘丁造冊南京各衛送南京戶部在
外衛所送所在有司查照收糧敢有不先

儘正軍選補及將運糧正軍捏故掣回改
差濫點餘丁頂替虛費錢糧者叅
奏拏問如此則錢糧不至於虛費而
恩亦庶乎均一矣具題

申明茶法奏狀

陝西清吏司案呈卷查應天府批驗茶引
所直隸常州府宜興縣張渚批驗茶引所
浙江杭州府批驗茶引所節次關去茶引
自成化元年起至成化十年止陸續共關

過茶引五十八萬三千六百六十一道前去發賣各處茶商照賣茶斤累催不見銷繳查得本部先於景泰五年爲因各處茶商人等多將舊引影射私茶不行銷繳查照清理鹽法事例具

奏該戶部依擬奏

准出榜曉諭及行各處巡按巡鹽巡河巡江監察御史監收船料提督洪閘郎中等官禁治搜檢各批驗所追繳退引等因已經前

行遵守外今照前項退引累催不繳其故蓋因批驗所不置簿籍附寫茶商姓名貫址或不照茶商路引聽其冒名開報或將引由賣齋產茶地方轉賣與人如此欲得的確名籍行追繳引難矣況茶貨出山經過官司既不從公盤詰又不依例批驗縱有夾帶斤重多是受財賣放彼何畏憚而不停藏舊引影射私茶又如南直隸常州府廬州府池州府徽州府浙江湖州府嚴

五公奏稿卷三
三
州府衢州府紹興府江西南昌府饒州府
南康府九江府吉安府湖廣武昌府寶慶
府長沙府荊州府四川成都府保寧府重
慶府夔州府嘉定州瀘州雅州等處俱係
產茶地方相去前項三批驗所遠者數千
里近亦不下數百里若照引內條例聽茶
商徑赴產茶府州納課買引照茶於人為
便理必樂從誰肯不買引由公犯茶禁
却令茶商皆來此三所買引路途驚險

返不便欲其一一遵依不作前弊亦難矣
況批驗所退引該與截角今前項三所如
管賣引不行批驗照退名實不稱有乖職
掌呈乞施行等因到部臣等切惟印造茶
引鹽引禁治私茶私鹽係是

太祖高皇帝舊制今官不修職民不守法茶禁
廢弛一至於斯若不申明禁約非惟虧

國家之課程抑恐壞

祖宗之制度合無請給

聖旨榜文通行天下曉諭今後園戶賣茶及茶商興販茶貨造引給由與夫批驗納課等項務要俱遵引由內條例數內惟買引一事免其納錢只照見行事例每引一道納鈔一貫中夾紙一張仍令前項產茶府州斟酌所管地方每歲可出茶貨若干合用引由若干預先具數差人赴本部關領前引回還收貯出榜召商中買仍要辯驗茶商路引果無詐偽即將其人姓名貫址附

簿將引給與年終該府州各將賣過前引造冊就將收過紙鈔差人一同解繳本部鈔送該庫交收紙劄造引仍具數領關次年合用引由各批驗所如遇茶商經過務依例逐一批驗將引截角如無夾帶即便放行若有夾帶就連人茶拏送本處官司問理年終將批驗過客商姓名貫址并引數目及盤獲私茶起數緣由造冊申達所轄轉繳本部查考如有日前停藏舊引未

曾繳報者榜文到日限三箇月以裏赴所
在官司告繳與免本罪敢有不遵條件與
販私茶者許巡按巡鹽巡河巡江監察御
史監收船料提督洪閘郎中等官及各該
軍衛有司守把關隘人員拏問挑擔馱載
及引領牙行停藏之家俱依律治罪盤獲
私茶并盤車船頭畜等物俱入官如將引
由照茶依例批驗截角賣畢隨將赴往賣
所在官司告繳封送原引衙門通類解部

查銷若有過期不繳者原領引衙門查報
各該巡按監察御史按察司提問追繳如
此則職掌定而政務修法令明而奸蠹息
緣係申明舊例清理茶法事理未敢擅便
今將茶引由內條例開坐具題

一茶引由內茶引一道納銅錢一千文
照茶一百斤茶由一道納銅錢六百
文照茶六十斤見行事例每引由一
道納鈔一貫中夾紙一張

一諸人但犯私茶與私鹽法一體治罪如將已批驗截角退引入山影射照茶者同私茶論

一客商與販茶貨先赴產茶府州具報所賣斤重依例納課買引照茶出境發賣如至住賣去處賣畢隨即於所在官司繳納原引如或停藏影射者同私茶論

一山園茶主將茶賣與無引由客商與販者初犯笞三十仍追原價沒官再犯笞五十三犯杖八十俱倍追原價沒官

一茶引不許相離有茶無引多餘夾帶並依私茶定論

一客商販到茶貨經過批驗所須要依例批驗將引由截角別無夾帶方許放行違越者笞二十

一偽造茶引者處死籍沒當房家產告

捉人賞銀二十兩

一賣茶去處赴宣課司依例三十分抽
一分芽茶葉茶各驗價直納課
一販茶不拘地方

欲令兩淮山東長蘆三運司將鹽引紙
每張納鈔一貫奏狀

陝西清吏司案呈照得本部先行收貯各
運司送納印刷鹽引紙張數多奏

准行移兩淮山東長蘆三運司每紙一張折收

鈔一貫解送本部轉送南京

內府收貯以為文武官員旗役人等折俸支
用其餘兩浙等運司仍用紙張後因紙有
不敷又經奏

准照舊納紙外今查得本部迺年收到各運司
送納印刷鹽引紙除支用外共有七百一
十餘萬張在庫約穀七八年支用外若再
收紙積之年久不無損壞况今南京

內府收貯鈔貫數少不穀折俸買辦等項支

用案呈如蒙乞

勅該部計議合無照例仍行兩淮山東長蘆三運司自文書到彼日為始各將該納印刷鹽引紙張暫且停止令其每紙一張納鈔一貫差人解部轉送南京

內府交納本部照數換與鹽引兩浙等運司仍照收紙如此則紙張不致損壞而鈔貫亦可以備用矣緣係處置鹽引紙張易鈔備用事理未敢擅便具題

欲令公侯駙馬伯具印信文書關支祿米奏狀

陝西清吏司案呈照得南北二京公侯駙馬伯祿米通年差人俱赴本部關支本部照依戶部咨文內開來數目於蘇松常三府運到秋糧米內撥支緣各官差來令人家人人等俱無印信公文投部止是照驗各人路引撥與及至關支完日原引隨身帶回本部無可備照設若有等冒名告關

無憑查考且如已故寧陽侯陳潤妻唐氏
與新襲爵寧陽侯陳瑛告爭祿米只爲頂
名關支至今爭訟未息慮恐今後亦有此
弊若不處置深爲未便案呈到部查得北
京大小文職官員差人關支三分四分俸
糧俱冬齎有本衙門印信手本到於南京
該衙門造來糧冊查對相同然後給與俸
帖照數關支所以事無差池卷亦明白如
蒙乞

勅該部計議合無行移兩京公侯駙馬伯今後
關支祿米亦照前例不分坐府管事不管
事公差在外合行移該府或附近相應衙
門令首領官吏具印信手本若衙門品級
亞於本部者令堂上官吏具印信手本各
開該支祿米數目并差來關領之人姓名
就付本人齎執前來關支仍照先年奏
在限期赴部查對明白立案關支如此則真僞
易於查考而祿米不至冒支矣爲此具題

王公奏稿卷三
改左副都御史巡撫雲南謝 恩奏狀
臣先任河南布政使司左布政使成化元
年欽蒙

聖恩陞都察院右副都御史仍支從一品俸歷
陞本院左副都御史南京刑部左侍郎改
刑部左侍郎再改南京戶部左侍郎今又
蒙

聖恩改 臣前職巡撫雲南伏念 臣本草茅賤士
樗櫟庸材誤蒙

聖恩節次遷轉粉骨碎身不能補報雖雲南遠
在萬里之外夷情不常難於撫治 臣敢不
罄竭駑鈍敷宣

德意以圖萬一之報除望

闕謝

恩前去理事外成化十二年九月十二日具題
欲帶男承祿隨侍奏狀

臣原任南京戶部左侍郎欽蒙

聖恩改 臣前職巡撫雲南切緣雲南遠在萬里

之外古謂不毛之地水土與北方不同北
人到彼難爲調理臣生長北方況今年踰
六十日漸衰老非親人隨行不可伏望
聖慈憐憫容臣帶男王承祿前去朝夕扶持看
視飲食勉力圖報不勝感戴之至成化十
二年九月十二日具題

王公奏稿卷之二